

## REGIONAL NEWS

HEADLINES:-

1. Member of Parliament (Lok Sabha) inthlanpuia Mizorama seat pakhat awm chuh tura hming pek luh te pawm vek a ni.
2. Mizoram Pradesh Congress Committee leh MNF Tuichang North Block te chuan vawiin khan Lok Sabha MP inthlan Campaign beihpui an thlak tan a. ZPM chuan thla thar ni 1-ah beihpui an thlak tan ang.
3. Lok Sabha inthlan thawh hnihna atana hriattirna chu vawiin khan tihchhuah a ni.
4. Sawrkar laipui chuan kum 2024-2025 chhunga Mahatma Gandhi National Rural Employment Guarantee Act, MGNREGA hlawh tihpunna tur hriattirna a ti chhuak

&lt;&gt;&lt;&gt;&lt;&gt;

MP CANDIDATES NOMINATIONS SCRUTINY

Member of Parliament (Lok Sabha) inthlanpuia Mizorama seat pakhat awm chuh tura hming pek luh te vawiin khan endik a ni a; hming pek luhte pawm vek a ni.

Vawiin khan heng mite leh an aiawh te'n Returning Officer, Nazuk Kumar-i hovin a pisa, Aizawl DC Office-ah General Observer Dr. Nipun Vinayak telpuinain hming pek luhte hi an endik a. Recognised National & State Party Candidate Pu Lalbiakzama, Indian National Congress; Pu Richard Vanlalmangaiha, Zoram People's Movement; Pu Vanlalmuaka, Bharat Janata Party; Pu K. Vanlalvena, Mizo National Front te, Recognised National & State Political Party ni lo, Registered Political Party candidate Pi Rita Malsawmi, Mizoram People's Conference leh Independent Candidate Pu Lalhriatrenga Chhange te nomination chu pawm vek a ni.

&lt;&gt;&lt;&gt;&lt;&gt;

ADDL. CEO & JT. CEO ON MP ELECTION

Akashvani Aizawl Regional News Unit chuan Lok Sabha inthlan chungchangah Nodal Officer for Media, Addl. CEO Dr.H. Lianzela leh Directorate of Elections-a Joint CEO Pu James Lalnunmawia te kawmin Lok Sabha inthlanpui atana hmalakna hrang hrang bakah thil tul leh pawimawh hrang hrangte an zawt a.

Inthlan thuneitute chuan tun tum Lok Sabha inthlanpuiah hian Mizoramah vote nei mi Nuai 8 Sing 6 Sang 1 leh 277 an awm mek thu te, chung zinga Nuai 4 Sing 1 leh Sang 4 leh 777 chu mipa an ni a; hmeichhe voter Nuai 4 Sing 4 Sang1 leh 520 an awm thu te, District 11-ah polling station 1,276 a awm mek thu bakah kum 2019-a Lok Sabha MP inthlanah khan polling station 1,175 awmin tun tumah hian polling station 101 a awm belh thu te an lo hrih a.

Vote thlak niah hian mipuiten hahdamtaka vote an thlak theih nan Assured Minimum Facility (AMF) hman tum leh niin hei hi ngaih pawimawh tur zinga mi a ni a. Bial tinah hmeichhe hlangin an vil leh PwD ten an vil polling station pakhat tal awm tura hma lak mek a ni a. Hei bakah hian tualchhuak hmanraw hmanga siam leh hnam zia tilang thei tura chei Model Polling Station pakhat tal a awm dawn baw bakah thalaiten inthlan an ngaih pawimawh lehzuala nasa zawka an inhnawih ve theih nan District tina Polling Station pakhat tal chu inthlan buaipuitu zinga naupang pakhatin a vil tura duan a ni.

Kumin MP inthlanpui atang hian EVM/VVPAT model thar ber M3 chu hman tan a ni dawn a. ECI chuan VVPAT leh EVM thahnem tak a rawn dah tawh a. First Level Checking (FLC) neih tawh niin chung zingah chuan Ballot Unit 2,158, Control Unit 2,195 leh Voter Verifiable Paper Audit Trail (VVPAT) 2,228 te chu vote thlak huna hman theih mai turin District tinah venhimna khauh tak hnuaiah a awm vek tawh a ni.

Pianphunga rualban lo (PwD) leh kum 85 tling chinte tan Home Voting tih theih a ni leh dawn a, polling station-a kal harsatna neite chuan DEO, RO leh ARO hnenah 12D hmangin Home Voting dilna thehluh theih a ni.

Inthlanna mawhphurna hrang hrang nei tur te pawh RO leh ARO te'n an ruat fel vek tawh a. Official duty tur te hi India International Institute of Democracy and Election Management (IIIDEM)-in training neih dan tur a duan ang takin training pek tur an ni a. Duty nei zawng zawng ten an mawhphurhna an hlen vek theih nan District tinah vote thlak ni thlengin training hi neih chhoh zel tur a ni.

Inthlan chungchangah hian Addl. CEO chuan hetiang hian mipui hnenah ngenna a siam a – (Byte)

<><><>

#### MP ELECTION PARTIES CAMPAIGN

Mizoram Pradesh Congress Committee (MPCC) chuan vawiin khan Lok Sabha MP inthlan Campaign beihpui an thlak tan.

Campaign beihpui hawnna Aizawl Vanapa Hall-ah MPCC Official Candidate Pu Lalbiakzama chuan, kum 1947 a zalenna neia India a lo pian khan India hma hun chu kawng hnihah a innghat a; pakhatin sakhaw pakhat vulh len an duh laiin Hnam Pa tia sawi tak Mahatma Gandhi-a kaihhruai chuan India ram chhunga hnam chi hrang hrang, sakhaw biak chi hrang hrang te him leh zalen taka an awm theih nan Danpui an lo duang ta zawk a ni, a ti a. An elpui BJP te thil tum ber chu Hindu sakhaw vulh lena mi dang nek chep a nih thu sawiin an theih ang angin India Danpui pawh sawi danglam zel an tum niin a sawi.

MPCC Campaign Chairman Pu Lalnunmawia Chuaungo pawhin thu sawiinin, sorkar laipuaia BJP sorkar paih thlak theih nan Mizo mipuiten theihtawp an chhuah a ngai, a ti a, BJP thawhpui sa MNF MP thlan tlin a nih chuan zalenna humhim theih a ni dawn lova, ZPM pawh BJP thawhpui leh mai tur an ni, a ti.

MPCC Campaign beihpui hawnna inkhawma tel mipuite chuan lungual takin resolution an pass a. An resolution pass zingah chuan 'India ram Democracy bulthut Indian Constitution-in mipuite zalenna min pek (right to Freedom) min paih bosak mektu leh Pathian ram zauhna tura mission field-a rawngbawlina kawnga nasa taka harsatna min siamsaktu Central-a BJP leh a tanrualpui Party te NDA sawrkar hi paih thlak a nih theih nan Congress Party chuan theihtawp kan chhuah dawn a, keini Mizo, hnam tlem leh hnufualte chimral hlauhawma min dahtu BJP hi engti kawng mahin kan thawhpui dawn lova, kan dodal zel dawn'tih te a tel.

Mizo National Front, Tuichang North Block pawhin vawiin khan Khawzawl Vengthara Mizo Hnam Run-ah Lok Sabha Inthlanpui Campaign beihpui an thlak tan a. MNF Gen. Hqrs. President Pu Zoramthanga'n he hun hi a hmanpui a. Pu Zoramthanga chuan Inthlanpuiah tling ve ngei tura an inngaih laia an tling zo ta lo chu tu thiam loh mah a nih loh thusawiin, Pathian remruat ve reng a ni a, ZPM sawrkar enchhin a hun ve tawh tih hriat nan Pathianin ZPM thli a tlehtir a ni, a ti.

MP inthlan hmachhawn mekah MNF-in NDA a zawm chu mi tam takin beih nan an hman leh a rin thu sawiin Pu Zoramthanga chuan NDA-a an tel chung pawhin Mizoram tana tha lo BJP policy te chu na taka an do zel zawk avangin NDA atanga chhuak tura duh ber tute chu BJP an ni zawk, a ti a. NDA rorelna sanga Mizo hnam tana tha lo thut chilha bei turin MNF chuan NDA a chhuahsan duh lo zawk niin a sawi a. NDA-ah hian Mizoram leh hnam humhalh nan an kal zel tur thu a sawi a. Lok Sabha MP Candidate Pu K. Vanlalvena chu enchhin tawh sa, a tha tawh a ni tih hriat tawh sa a nih avangin mipui tih tur chu vote mai a ni, a ti.

Khawzawla Campaign hawna hunah hian Dy. Chief Minister hlui Pu Tawnluia; Home Minister hlui Pu Lalchamlia leh MLA Pu Ramthanmawia te pawhin thu an sawi a ni.

MNF MP Candidate Pu K. Vanlalauva hian tukin khan Serchhip Press Club-ah chanchinbumite kawmin Lok Sabha inthlanpuiah thlan tlin a nih chuan State sorkar chu Mizoram hmasawna turin theihtawp a chhuahpui dawn thu a sawi a. India ram politics kal mekah Political Party hrang hrang 40 rual awmna NDA lamah a thut dawn thu pawh sawiin NDA-a party lian ber BJP nen erawh ngaihdan hrang hrangah an inmil loh thu leh inzawmna an neih dawn tloh th ute, ram rorelna Inpui-ah hnam hnufual leh sakhaw tenau tan sakhaw zalenna a awm theih nan Kristian MP a tam thei ang an thut a ngai, a ti bawk.

Serchhipa chanchinbumite nen an inkawmhonaah hian Pu K. Vanlalvena hi MNF Vice President Dr R.Lalthangliana leh MNF Media & Publicity Board Chairman Pu J.Malsawmzuala Vanchhawngte bakah Serchhip MNF 'E' Block hruaituten an tawiawm a ni.

Rorel lai ZPM chuan thla thar, April ni 1-ah inthlan campaign beihpui hi an thlak tan dawn a. Aizawl Vanapa Hall-ah beihpui thlakna hi hawngin an party Candidate Pu Richard Vanlalhmangaiha leh Chief Minister Pu Lalduhoma te'n thu an sawi dawn a ni.

<><><>

#### MKHC ON MP ELECTION

Lok Sabha thlan hmachhawn mekah Mizoram Kohhran Hruaitute Committee (MKHC) chuan mipui hnenah inthlan thuchah an siam a, an thuchah hi Mizoram mipui, Political party leh Kohhran te zawm turin an ngen.

MKHC hian April ni 13-ah state pum huapin Kohhran inkhawmah tawngtai theuh turin an ngen a. Tawngtai thupui atan - inthlan tluang taka neih a nih theih nan leh Mizoram aiawhtu mi tha tak thlan chhuah a nih theih nan te, Mizoramah sakhaw zalenna tha tak a awm zel theih nan leh sakhaw pawl hrang hrangte intibuai lova inrem taka an awm zel theih nan te leh India ramah Kristian-te rawngbawlna nekchepna leh harsatna siam zawnga hmalaknate hi a lo bo theih nan tih te hman ni se, an ti a.

Hei bakah hian Political Party leh ram mipuite tan Lok Sabha inthlan chungchangah thuchhuah an siam tel bawk a. Zalen tak leh duh thlanna dik hmanga mi tinin vote an thlak theih nan hel pawl leh ralthuam lam chi hman te, invau te, inbum te, sum sem te tih loh ni se an ti a. Hnam bil zawng te, khawtlang inpumkhatna leh kohhran inunauna tiche zawng tein eng pawl mahin hma lak loh ni se, mi mal leh pawl insawichhiat vak vak te, tharum thawhna chawh tho zawnga inelsen leh in auhnawmna te tih loh ni se tih te leh ther-hlo leh sum umin tumahin vote hralh loh ni se, an ti a ni.

<><><>

#### TRAINING ON TOBACCO CONTROL FOR LAW ENFORCERS

National Tobacco Control Programme, National Health Mission te leh Aizawl Traffic Police te chuan vawiin khan Aizawl SP Conference Hall-ah 'Training on Tobacco Control for Law Enforcers (Traffic Police)' an huaihawt.

He hun hi National Tobacco Control Programme State Nodal Officer, Dr. H. Lianthangpuia'n a kaihruai a, Traffic Police Sr. Superintendent Pu Stephen Lalrinawma'n hun a hmanpui

National Tobacco Control Programme State Legal Consultant, Pi Vanlalzari'n 'Vaihlo khuahkhirhna dan leh a kaihnawih' dan hrang hrangah a lem nena entirin zirtirna hun a hmang a. Tunlaimipui phurtu lirthei hrang hrangah meizuk ching an la awm thin a, heng - Taxi, Maxi Cab, City Bus leh lirthei dangah te hian meizuk khap tlat a ni a, meizu man an awm a nih chuan Cheng 200 thleng pawisa chawitira hrem theih an ni, a ti a.

Heng lirthei hrang hrang khalhtute pawhin he khapna dan hi zawm theuha, an lirthei chhungah an passenger te pawhin meizuk an tum pawha phal lo ngam theuh turin a ngen thar leh bawk a. Puipunna hmun hrang hrangah meizuk hi khap tlat a ni bawk a, mi tinte he khapna dan hi tha tak a zawm theuh turin a ngen nawn leh vek bawk a ni.

<><><>

#### LOK SABHA

Lok Sabha inthlan thawh hnihna atana hriattirna chu vawiin khan tihchhuah a ni. Inthlan thawh hnihna hi state 12 leh Union Territory pakhata MP seat 88 ah buatsaih a ni dawn a. Inthlan thawh hnihna hi Kerala ah seat 20, Karnataka-ah seat 14, Rajasthan ah seat 13, Uttar Pradesh leh Maharastra ah seat 8, Madhya Pradesh ah seat 7, Assam leh Bihar ah seat 5 ve ve, West Bengal leh Chhatisgarh ah seat 3 ve ve leh Manipur, Tripura leh Jammu and Kashmir ah seat khat theuh a ni ang.

Inthlan chuh tumte tan thlaleh April ni 4 thleng hun hawn a ni a. A tuk April ni 5 ah endik an ni ang a, April ni 26 ah vote thlak a ni ang.

<><><>

#### MNREGA

Sawrkar laipui chuan kum 2024-2025 chhunga Mahatma Gandhi National Rural Employment Guarantee Act, MGNREGA hlawh tihpunna tur hriattirna a ti chhuak. Ni khat hlawh hi Haryana-ah cheng 374, Goa ah cheng 358, Karnataka ah cheng 349, Kerala ah cheng 346 leh Punjab ah cheng 322 te a ni a. Union Rural Development Ministry chuan hlawh thar hi April ni 1 atanga hman tan tur anih tu a tarlang bawk a ni.

MNREGA hlawh ennawn hnuhnun ber hi nikum March thla kha a ni.

<><><>